

## OPERATIVNI LEASING - OPŠTI USLOVI ZA ZAKLJUČENJE UGOVORA O OPERATIVNOM LEASINGU

Ovi Opšti uslovi za operativni leasing (u daljem tekstu: **Opšti uslovi**) su sastavni dio svakog Ugovora o operativnom leasingu (u daljem tekstu: **Ugovor**). Izrazi definisani Ugovorom imaju, ako drugačije nije izričito određeno, isto značenje i u Opštim uslovima. Upotreba pojedinih odredbi Opštih uslova u Ugovoru može biti isključena samo u slučaju kada je to izričito ugovoreno.

### ZNAČENJE IZRAZA:

**Leasing** je pravni posao u kojem Davalac leasinga prenosi pravo posjedovanja i korištenja Predmeta leasinga na Korisnika leasinga na određeni vremenski rok, a zauzvrat Korisnik leasinga se obavezuje da mu za to plaća ugovorenu leasing naknadu.

**Operativni leasing** je pravni posao u kojem Korisnik leasinga u periodu posjedovanja i korištenja Predmeta leasinga plaća Davaocu leasinga određenu naknadu bez opcije kupovine i sticanja prava vlasništva nad Predmetom leasinga, a Davalac leasinga snosi troškove amortizacije Predmeta leasinga.

**Ugovor** podrazumijeva Ugovor o operativnom leasingu zajedno sa Opštim uslovima, Zahtjevom za zaključenje Ugovora, Ponudom, Pozivom za prvo plaćanje, Zapisnikom o preuzimanju Predmeta leasinga u ime Davaoca leasinga, punomoćima, Aneksima na Ugovor i dodatnim ugovorima ukoliko postoje, kao njegovim sastavnim, neodvojivim i obavezujućim dijelovima.

**Davalac leasinga** označava „Porsche leasing“ d.o.o.

**Korisnik leasinga** označava pravno ili fizičko lice, koje je sa „Porsche leasing“ d.o.o. zaključilo Ugovor kao glavni dužnik, na osnovu kojeg stiče pravo posjedovanja i korištenja Predmeta leasinga.

**Sudužnik** označava pravno ili fizičko lice koje je sa „Porsche leasing“ d.o.o. zaključilo Ugovor, na osnovu kojeg odgovara Davaocu leasinga sa Korisnikom leasinga, pod jednakim uslovima kao i Korisnik leasinga, za sve obaveze Korisnika leasinga.

**Dobavljač** Predmeta leasinga je lice koje je prema slobodnoj volji i vlastitom nahođenju odabrao Korisnik leasinga, te koje na osnovu ugovora ili na drugi zakonom propisan način nabavlja i isporučuje Predmet leasinga, te na Davaoca leasinga prenosi pravo vlasništva nad Predmetom leasinga.

**Predmet leasinga** je pokretna ili nepokretna stvar, u skladu sa propisima koji uređuju vlasništvo, odnosno druga stvarna prava, nabavka i korištenje koje se finansira putem operativnog leasinga, a koja je jasno naznačena u Ugovoru.

**Leasing naknada** je novčani iznos koji Korisnik leasinga plaća Davaocu leasinga na osnovu posjedovanja i korištenja Predmeta leasinga, a čiji je iznos prikazan u Ugovoru. Ukupna naknada, koja se naplaćuje od Korisnika leasinga po Ugovoru, obuhvata troškove zaključenja Ugovora Davaoca leasinga, kao i sve ostale troškove koji su poznati i izvjesni, te je promjenljiva u skladu sa odredbama Ugovora.

**Ostatak vrijednosti** predstavlja predvidivu vrijednost, koja se određuje na osnovu očekivanog korištenja i amortizacije Predmeta leasinga ili predviđenog broja pređenih kilometara kod motornih vozila. Ostatak vrijednosti služi isključivo kao osnov za izračun mjesečne leasing naknade, te ne predstavlja otkupnu cijenu Predmeta leasinga.

**Akontacijska naknada** je iznos koji Korisnik leasinga unaprijed plaća Davaocu leasinga prilikom zaključenja Ugovora, a za koji se umanjuje iznos ukupne leasing naknade, te koja se ne vraća Korisniku leasinga u slučaju raskida Ugovora.

**Troškovi zaključenja Ugovora** obuhvataju troškove zaključenja Ugovora u iznosu izričito navedenom u Ugovoru.

**Primjena** Ugovora počinje na dan preuzimanja Predmeta leasinga od strane Korisnika leasinga.

---

### PORSCHE LEASING D.O.O.

Trg međunarodnog prijateljstva 24 | 71000 Sarajevo | Tel: 033 257 147 | Fax: 033 257 149 | [www.porscheleasing.ba](http://www.porscheleasing.ba)

Matični broj: 65-01-0350-15

JIB: 4202098010005, PDV: 202098010005, Broj žiro računa: 1610000138130048, Raiffeisen Bank d.d. Sarajevo

Podružnica Banja Luka: Milana Kranovića 2, 78000 Banja Luka, JIB: 4202098010013

## 1. ZAKLJUČENJE UGOVORA I TROŠKOVI ZAKLJUČENJA UGOVORA

1.1 Osnov za zaključenje Ugovora o operativnom leasingu predstavlja Zahtjev za zaključenje Ugovora. Nakon obavještenja Davaoca leasinga Korisniku leasinga o odobrenju finansiranja, Ugovor se potpisuje, čime Korisnik leasinga preuzima prava i obaveze koje proizilaze iz Ugovora. Primjena ovog Ugovora počinje na dan preuzimanja Predmeta leasinga od strane Korisnika leasinga.

1.2 Davalac leasinga će Korisniku leasinga, pri zaključenju Ugovora, obračunati jednokratni trošak zaključenja Ugovora, uvećan za porez na dodanu vrijednost, za pripremu i zaključenje Ugovora, koji trošak je Korisnik leasinga dužan platiti zajedno sa prvom leasing naknadom, u skladu sa Pozivom za prvo plaćanje.

1.3 Korisnik leasinga se obavezuje da od Davaoca leasinga, po njegovom pozivu, bez odlaganja preuzme Predmet leasinga na dogovorenom mjestu i u dogovoreno vrijeme. Korisnik leasinga snosi sve troškove prevoza Predmeta leasinga i osiguranja prevoza koji nastanu nakon što Korisnik leasinga primi poziv za preuzimanje Predmeta leasinga.

1.4 Ukoliko nakon prijema poziva za preuzimanje Predmeta leasinga Korisnik leasinga to odbije, Ugovor se raskida, a Davalac leasinga ima pravo zadržati ugovorenu akontacijsku naknadu, ugovorene troškove obrade zahtjeva za zaključenje Ugovora, kao i ostale troškove nastale zaključenjem Ugovora.

1.5 Ukoliko Korisnik leasinga poslije preuzimanja Predmeta leasinga raskine Ugovor, dužan je o tome obavijestiti Davaoca leasinga pisanim putem, te u roku od osam (8) dana od dana raskida Ugovora izvršiti povrat Predmeta leasinga Davaocu leasinga, o vlastitom trošku. U tom slučaju, Korisnik leasinga dužan je odmah, a najkasnije u roku od osam (8) dana od dana raskida Ugovora isplatiti Davaocu leasinga naknadu u vrijednosti od 18% od zbira svih preostalih neto leasing naknada.

1.6 Ukoliko Korisnik leasinga ne ispuni svoju obavezu iz prethodnog stava ovog člana, svaka dostava obavijesti i drugih pismena Korisniku leasinga na adresu navedenu u Ugovoru smatrat će se važećom, bez obzira da li je Korisnik leasinga primio pošiljku ili ne, a danom prijema preporučene pošiljke smatrat će se dan slanja iste od strane Davaoca leasinga.

1.7 Pisana komunikacija između Davaoca leasinga i Korisnika leasinga vrši se prema adresi, poštanskoj i/ili elektronskoj, o kojoj je Korisnik leasinga obavijestio Davaoca leasinga. Jednostrana obavještenja Davalac leasinga može slati i upotrebom SMS servisa, odnosno slanjem tekstualne poruke na broj telefona Korisnika leasinga registrovan kod Davaoca leasinga u skladu sa relevantnim propisima.

## 2. AKONTACIJSKA NAKNADA / PLAĆANJE PRIJE ISPORUKE

2.1 Akontacijska naknada, ukoliko je ugovorena i iskazana odredbama Ugovora, je iznos koji Korisnik leasinga unaprijed plaća Davaocu leasinga prilikom zaključenja Ugovora, a za koji se umanjuje iznos ukupne leasing naknade. Akontacijska naknada se ne vraća Korisniku leasinga u slučaju raskida Ugovora.

2.2 Prije preuzimanja Predmeta leasinga, a najkasnije tri (3) dana nakon zaključenja Ugovora, Korisnik leasinga je dužan na transakcijski račun Davaoca leasinga (račun br:161-00001381300-48 kod Raiffeisen Bank d.d. Bosna i Hercegovina), izvršiti uplatu po Pozivu za prvo plaćanje, koja

se sastoji od: akontacijske naknade, prve mjesečne leasing naknade, troškova zaključenja Ugovora, ostalih troškova povezanih sa zaključenjem Ugovora i pripadajućih poreza. Odredbama ugovora o operativnom leasingu ugovorne strane mogu isključiti plaćanje nekog od navedenih elemenata prvog plaćanja.

2.3 Korisnik leasinga ovim putem izričito potvrđuje da je Predmet leasinga, kao i Dobavljača sam izabrao, te da je sam ugovorio uslove isporuke i cijene Predmeta leasinga. Ako Davalac leasinga prije isporuke plati Predmet leasinga u potpunosti ili djelimično, u skladu sa uslovima Dobavljača, Korisnik leasinga u potpunosti preuzima rizik isporuke Predmeta leasinga.

2.4 Dobavljač odgovara Korisniku leasinga za isporuku Predmeta leasinga.

2.5 Ukoliko akontacijska naknada nije ugovorena isključena je primjena ovog člana Opštih uslova, osim djela člana 2.2 koji se odnosi na prvo plaćanje koje u tom slučaju obuhvata ostale ugovorene naknade izuzev akontacijske naknade.

## 3. LEASING NAKNADA – VISINA I NAČIN PLAĆANJA, PRILAGOĐAVANJE LEASING NAKNADA

3.1 Leasing naknada obračunata je u valuti EUR, te iskazana u protuvrijednosti domaće valute konvertibilnim markama (KM), prema srednjem kursu Centralne banke Bosne i Hercegovine na dan plaćanja.

3.2 Korisnik leasinga je dužan za svo vrijeme trajanja Ugovora plaćati Davaocu leasinga ugovorene leasing naknade za korištenje Predmeta leasinga, Davalac leasinga će Korisniku leasinga za svaku mjesečnu leasing naknadu ispostaviti račun sa opštim rokom plaćanja koji je iskazan Ugovorom i ispostavljenim računom.

3.3 Ukoliko strane postignu saglasnost o odloženom plaćanju usluga Ugovorom o operativnom leasingu će biti označeno ugovoreno posebno dospjeće plaćanja računajući od datuma opšteg roka plaćanja u kojem je Korisnik leasinga obavezan da izvrši plaćanje.

3.4 Davalac leasinga će prilikom knjigovodstvene obrade uplata zatvarati najstarije obaveze Korisnika leasinga prema sljedećem redosljedu: (I) troškovi i porezi plaćeni u ime Korisnika leasinga, (II) zakonske zatezne kamate, (III) administrativni troškovi Davaoca leasinga, te (IV) mjesečna leasing naknada.

3.5 Ukoliko od trenutka zaključenja Ugovora do trenutka isporuke Predmeta leasinga bude izmijenjena nabavna vrijednost ili dodatni troškovi uslijed bilo kojeg razloga, ili budu izmijenjeni iznosi carine, poreza, premija osiguranja i ostalih davanja, odnosno uvedeni novi troškovi od strane državnih organa na koje izmjene ugovorne strane nemaju uticaja, Davalac leasinga ima pravo prilagoditi leasing naknadu u skladu sa navedenim promjenama.

3.6 Ako Davalac leasinga plati u ime i za račun Korisnika leasinga ostale troškove (troškove osiguranja koje je bio obavezan da plati Korisnik leasinga, prekršajnih naknada / kazni ili nekih drugih kazni i sl.) u toku trajanja Ugovora, isti će biti fakturirani Korisniku leasinga od strane Davaoca leasinga, u visini stvarnih troškova, a u skladu sa Pravilnikom o naknadama Davaoca leasinga. Troškovi nastali za Davaoca leasinga u svrhu naplate dospjelih potraživanja, kao što su troškovi advokata, suda i sl. bit će zaračunati Korisniku leasinga u visini stvarnih troškova.

3.7 Ukoliko tokom trajanja Ugovora o operativnom leasingu od

momenta preuzimanja Predmeta leasinga dođe do određenih promjena odlukama državnih organa, a na koje Davalac leasinga nije mogao utjecati, kao što su npr. promjene visine poreza, administrativnih naknada, taksi i slično, Davalac leasinga ima pravo na odgovarajući način prilagoditi iznos leasing naknade. Ovakvo usklađivanje neće se smatrati izmjenom ili dopunom Ugovora, te za isto neće biti potrebna saglasnost Korisnika leasinga.

3.8 Ukoliko je Predmet leasinga motorno vozilo, a Ugovorom je predviđena određena kilometraža u korištenju Predmeta leasinga, ukoliko korištenjem Predmeta leasinga tako ugovorena kilometraža bude prekoračena, Korisnik leasinga dužan je platiti dodatnu naknadu Davaocu leasinga koja je utvrđena Ugovorom o operativnom leasingu, pri čemu Davalac leasinga ima pravo sačiniti novu kalkulaciju sa novom kilometražom i izvršiti odgovarajuće usklađivanje leasing naknade, sve u skladu sa odredbama Ugovora. Ovakvo usklađivanje može uslijediti kako tokom trajanja ovog Ugovora, tako i na kraju Ugovora.

3.9 Davalac leasinga će blagovremeno pisanim putem obavijestiti Korisnika leasinga o svakoj promjeni mjesečne leasing naknade.

3.10 Sve uplate će se smatrati blagovremenim uplatama ukoliko su proknjižene na transakcijski račun Davaoca leasinga prije, kao i na dan dospijeca određen na osnovu ispostavljenih računa. Prijevremeno uplaćeni iznosi za mjesečne leasing naknade se ne vraćaju, na njih se ne obračunava kamata, niti revaloriziraju, već se rasknjižavaju pri dospijecu sljedeće mjesečne leasing naknade.

3.11 Ukoliko Korisnik leasinga kasni sa plaćanjem dospjelih obaveza iz ovog Ugovora, po bilo kojem osnovu, dužan je platiti zakonsku zateznu kamatu za svaki dan kašnjenja, po stopi od 12% godišnje u skladu sa Zakonom o visini stope zatezne kamate FBiH, odnosno 10,95% godišnje u skladu sa Zakonom o visini stope zatezne kamate RS, kao i trošak svake opomene na plaćanje u iznosu određenom ovim Opštim uslovima, te sve troškove nastale zbog namirenja ili osiguranja potraživanja iz Ugovora, kao i sve sudske i van sudske troškove.

3.12 Korisnik leasinga, koji kasni sa plaćanjem dospjelih obaveza iz Ugovora, će pored zatezne kamate iz prethodnog stava nadoknaditi Davaocu leasinga i trošak svake opomene poslana poštom u iznosu od 1,00 KM (slovima: jedan i 00/100 KM) za prvu opomenu, 2,00 KM (slovima: dvije i 00/100 KM) za drugu opomenu i 3,00 KM (slovima: tri i 00/100 KM) za treću opomenu, uvećano za porez na dodanu vrijednost prema zakonskim propisima, kao i sve troškove nastale zbog namirenja ili osiguranja potraživanja iz Ugovora, kao i sve sudske i van sudske (advokatske i sl.) troškove, troškove ovlaštenih lica od strane Davaoca leasinga, troškove traženja adrese i sl., u visini stvarnih troškova, a u skladu sa Pravilnikom o naknadama Davaoca leasinga.

3.13 Korisnik leasinga nema pravo kompenzirati svoja moguća potraživanja prema Davaocu leasinga sa potraživanjima iz Ugovora, bez izričite pisane saglasnosti Davaoca leasinga.

3.14 Ugovorene Leasing naknade ni u kojem slučaju ne uključuju finansiranje popravke i održavanje dodatne opreme naknadno ugrađene u vozilo, popravke i kvarove koji su nastali uslijed nestručnog upravljanja i održavanja od strane Korisnika leasinga, kao i sve ostale troškove koji nisu ranije predviđeni i uračunati u mjesečnu leasing naknadu, popravke, kvarove, zamjenu dijelova koji su izvršeni u neovlaštenom servisu ili su posljedica neuobičajenog korištenja Predmeta leasinga, zamjenu dijelova koji nisu originalni i u skladu sa preporukom ovlaštenog dobavljača i proizvođača, popravku unutrašnjih

presvlaka i tapaciranih dijelova, popravku multifunkcionalnog radio uređaja, navigacijskog sistema, popravke oštećenih lakiranih i zadržalih površina, svih drugih nepredviđenih troškova, poreza, taksi, kazni, te svih direktnih ili indirektnih davanja i tereta, te ostalih davanja čiji iznos i vrstu stranke nisu mogle odrediti i predvidjeti u vrijeme zaključenja Ugovora, a koji su nastali u vezi sa Ugovorom i njegovim ispunjenjem.

3.15 Davalac leasinga je obavezan bez naknade jednom godišnje, na zahtjev Korisnika leasinga, izdati pregled njegovih obaveza i izvršenih plaćanja.

#### **4. ISPORUKA / PREUZIMANJE I KARAKTERISTIKE PREDMETA LEASINGA I ODGOVORNOST ZA PRAVNE I MATERIJALNE NEDOSTATKE**

4.1 Korisnik leasinga je sam odabrao Predmet leasinga, te se neposredno kod Dobavljača upoznao sa uslovima isporuke i cijene Predmeta leasinga.

4.2 Davalac leasinga preuzima obavezu finansiranja nabavke Predmeta leasinga od Dobavljača, ali ne odgovora za rokove i uslove isporuke, kao ni za svojstva Predmeta leasinga ili ispunjenje obaveznih uslova u pogledu kvaliteta i drugih uslova Predmeta leasinga po posebnim propisima čija je primjena obavezna u Bosni i Hercegovini, kao ni posebnim propisima kojima se uređuje kvalitet određenih proizvoda.

4.3 Dobavljač će na svoj rizik i o svom trošku preduzeti sve potrebne radnje i mjere za prevoz, osiguranje i stavljanje u pogon Predmeta leasinga. Dobavljač vrši isporuku Predmeta leasinga neposredno Korisniku leasinga na dogovorenom mjestu i u dogovoreno vrijeme.

4.4 Za sve materijalne nedostatke na Predmetu leasinga odgovara isključivo Dobavljač, odnosno proizvođač, te je shodno tome Korisnik leasinga dužan sve zahtjeve koji se odnose na ispravno funkcionisanje Predmeta leasinga uputiti direktno Dobavljaču, odnosno proizvođaču Predmeta leasinga. Davalac leasinga ustupa Korisniku leasinga svoje zahtjeve iz garantnog lista prema Dobavljaču, odnosno proizvođaču Predmeta leasinga, ali se ni u kojem slučaju Davalac leasinga ne odriče svojih prava iz garancije Predmeta leasinga.

4.5 Mogući nedostaci Predmeta leasinga, odnosno ograničenje u mogućnosti korištenja Predmeta leasinga ili razdoblje mirovanja Predmeta leasinga neće imati utjecaja na obaveze Korisnika leasinga iz Ugovora, te ne mogu biti osnov za bilo kakav zahtjev Korisnika leasinga prema Davaocu leasinga.

4.6 Davalac leasinga ne odgovora za ispunjenje obaveznih uslova u pogledu kvaliteta i drugih uslova Predmeta leasinga po posebnim propisima čija je primjena obavezna u Bosni i Hercegovini, kao ni posebnim propisima kojima se uređuje kvalitet određenih proizvoda.

4.7 Davalac leasinga ne ustupa Korisniku leasinga svoje pravo iz garantnog lista na povrat uplaćene cijene.

4.8 Prilikom preuzimanja Predmeta leasinga sačinjava se Zapisnik o preuzimanju u tri (3) primjerka koji potpisuju i ovjeravaju pored Davaoca leasinga i predstavnici Dobavljača i Korisnika leasinga, od kojih po jedan primjerak Zapisnika zadržavaju Korisnik leasinga, Dobavljač i Davalac leasinga. Potpisivanjem Zapisnika o preuzimanju Predmeta leasinga, Korisnik leasinga potvrđuje da je Predmet leasinga preuzeo u svoj posjed u ispravnom stanju.

4.9 Korisnik leasinga je obavezan da bez odlaganja obavijesti Davaoca leasinga o bilo kakvom sporu ili zahtjevu koji je povodom Predmeta leasinga pokrenulo bilo koje treće lice koje tvrdi da polaže pravo na Predmet leasinga.

## 5. VLASNIŠTVO PREDMETA LEASINGA I KORIŠTENJE PREDMETA LEASINGA

5.1 Za svo vrijeme trajanja Ugovora, kao i nakon njegovog prestanka, isključivi vlasnik Predmeta leasinga je Davaoca leasinga, a Korisnik leasinga na osnovu Ugovora ne može steći pravo vlasništva nad istim. Korisnik leasinga ima pravo posjedovanja i korištenja Predmeta leasinga, pod uslovom da uredno izmiruje svoje obaveze iz Ugovora prema Davaocu leasinga.

5.2 Korisnik leasinga nema pravo prisvajanja ili drugo slično pravo na Predmetu leasinga, bez obzira iz kojeg odnosa i po kojem osnovu potiče eventualno potraživanje Korisnika leasinga prema Davaocu leasinga.

5.3 Korisnik leasinga ne može Predmet leasinga otuđiti, opteretiti niti dati u zakup, odnosno najam. Korisniku leasinga se izričito zabranjuje da pravnim poslom ili po bilo kojem drugom osnovu otuđuje Predmet leasinga, daje Predmet leasinga na korištenje trećim licima koja nisu navedena u listi korisnika iz Ovlaštenja za korištenje vozila, koja nisu osposobljena za njegovo korištenje i koja nemaju prethodnu pisanu saglasnost Davaoca leasinga. Korisniku leasinga se također zabranjuje da uspostavlja založna prava na Predmetu leasinga, ili da na bilo koji drugi način ugrožava ili krši pravo vlasništva Davaoca leasinga nad Predmetom leasinga.

5.4 Potpisom ovih Opštih uslova, Korisnik leasinga garantuje da Predmet leasinga neće koristiti za obavljanje Rent-a-car djelatnosti, auto-škole ili bilo koje druge neuobičajene poslovne djelatnosti, osim ako takva djelatnost nije izričito navedena u ugovoru ili posebnom sporazumu/ovlaštenju, zaključenog, odnosno datog, u pisanoj formi, da u vezi sa Predmetom leasinga neće zaključivati ugovor o poslovnoj saradnji, franšizingu ili neki drugi sličan ugovor na osnovu koga će u bilo kojem obliku treće lice steći pravo ili mogućnost da neposredno koristi Predmet leasinga, bez obzira na to da li je trećem licu takvo pravo prenijeto faktički ili samim Ugovorom, da neće na Predmetu leasinga uspostavljati založna prava ili na bilo koji drugi način ugrožavati ili umanjivati pravo svojine i posredne državnine Davaoca leasinga nad Predmetom leasinga.

5.5 Neovisno o tome da li je Dobavljač isporučio Predmet leasinga Davaocu leasinga, ili direktno Korisniku leasinga, pravo vlasništva nad Predmetom leasinga stiče Davaoca leasinga.

5.6 Korisnik leasinga je dužan odmah obavijestiti Davaoca leasinga o sudskom ili nekom drugom postupku, odnosno mjeri trećeg lica nad Predmetom leasinga ili nad njegovim dijelovima, kao što je zapljena, oduzimanje i slično. Korisnik leasinga je obavezan da preduzme sve potrebne mjere i radnje da zaštiti pravo vlasništva Davaoca leasinga.

5.7 Korisnik leasinga dužan je na Predmet leasinga dosljedno primjenjivati posebne zakonske propise i poslovne običaje koji se za operativni leasing primjenjuju u knjigovodstvu i poreznom pravu.

5.8 Korisnik leasinga dužan je pribaviti prethodnu pisanu saglasnost Davaoca leasinga za bilo kakve modifikacije ili izmjene Predmeta leasinga ili njegovo povezivanje sa nepokretnim ili pokretnim predmetima.

5.9 Ukoliko Korisnik leasinga sam ugrađuje dodatne brave, alarmne uređaje i sličnu opremu za zaštitu Predmeta leasinga, dužan je za to prethodno pribaviti pisanu saglasnost Davaoca leasinga, te Davaocu leasinga predati odgovarajuća sredstva za otključavanje, odnosno deblokadu takvih dodatnih brava, alarmnih uređaja i slične opreme.

5.10 Korisnik leasinga se obavezuje da u slučaju pokretanja postupka stečaja ili likvidacije nad njim, o tome bez odlaganja obavijesti Davaoca leasinga, koji u tom slučaju ima pravo odmah raskinuti Ugovor i zahtijevati povrat Predmeta leasinga, bez ikakve odgovornosti Davaoca leasinga za raskid Ugovora i povrat Predmeta leasinga. U takvom slučaju, Korisnik leasinga dužan je da stečajnog ili likvidacionog upravnika obavijesti o vlasništvu Davaoca leasinga nad Predmetom leasinga.

## 6. REGISTRACIJA PREDMETA LEASINGA I PRODUŽENJE REGISTRACIJE

6.1 Korisnik leasinga prema mjestu svog prebivališta, odnosno sjedišta, podnosi zahtjev za registraciju ili produženje registracije Predmeta leasinga nadležnom policijskom organu, koji Korisniku leasinga izdaje saobraćajnu dozvolu, a Davaocu leasinga potvrdu o vlasništvu. Shodno tome, Davaoca leasinga će Korisniku leasinga izdati ovlaštenje za registraciju i ovlaštenje za korištenje Predmeta leasinga.

6.2 Troškove registracije, tehničkog pregleda, osiguranja i druge povezane troškove snositi će isključivo Korisnik leasinga.

6.3 Korisnik leasinga se obavezuje da najkasnije osam (8) dana prije isteka roka važenja saobraćajne registracije Predmeta leasinga, preuzme od Davaoca leasinga ovlaštenje za produženje godišnje saobraćajne registracije i preduzme ostale potrebne radnje. Sve troškove vezane za produženje saobraćajne registracije Predmeta leasinga, za vrijeme trajanja Ugovora, snositi će Korisnik leasinga.

6.4 U slučaju da Korisnik leasinga ne izmiruje svoje obaveze u skladu sa Ugovorom, Davaoca leasinga zadržava pravo da kao vlasnik Predmeta leasinga uskrati Korisniku leasinga saglasnost za produženje saobraćajne registracije Predmeta leasinga, a Korisnik leasinga je u tom slučaju dužan vratiti Predmet leasinga u posjed Davaoca leasinga.

## 7. ODRŽAVANJE I ODGOVORNOST ZA PREDMET LEASINGA

7.1 Korisnik leasinga dužan je, za svo vrijeme trajanja Ugovora, Predmet leasinga držati u dobrom i ispravnom stanju, koje omogućava njegovu redovnu upotrebu, te postupati s Predmetom leasinga u skladu sa njegovom namjenom i tehničkim svojstvima, sa dužnom pažnjom, stalno vodeći računa o tome da Predmet leasinga bude u stanju u kakvom mu je predat od strane Dobavljača, imajući pri tome u vidu trošenje Predmeta leasinga primjereno njegovoj pravilnoj upotrebi i starosti.

7.2 Korisnik leasinga je dužan pridržavati se uputstava proizvođača o servisiranju, održavanju i upotrebi Predmeta leasinga. Održavanje i popravka Predmeta leasinga mogu biti obavljani isključivo u servisima Dobavljača ili kod ovlaštenih serviseri koji su potvrđeni u garantnom listu ili servisnoj knjižici. U održavanju Predmeta leasinga, Korisnik leasinga se obavezuje da koristi isključivo originalne rezervne dijelove.

7.3 Održavanje vozila iz prethodnog stava obavlja Korisnik leasinga o svom trošku.

7.4 Ako je za Predmet leasinga propisan tehnički pregled, atestiranje ili ispitivanje njegovog kvaliteta, onda je Korisnik leasinga dužan takav pregled obavljati redovno i pravovremeno, o svom trošku.

7.5 Bilo kakve modifikacije ili izmjene Predmeta leasinga ili njegovo povezivanje sa nepokretnim ili pokretnim predmetima bit će dozvoljeno samo uz prethodnu pisanu saglasnost



Davaoca leasinga. Bilo kakva izmjena, modifikacija i/ili dodatna instalacija u vezi sa Predmetom leasinga bez pisane saglasnosti Davaoca leasinga, postat će vlasništvo Davaoca leasinga bez bilo kakve naknade. U slučaju da u toku trajanja Ugovora o leasingu zakonski bude potrebno da se modifikira Predmet leasinga, Korisnik leasinga će to obaviti o svom trošku bez prava na bilo kakvu naknadu od Davaoca leasinga.

7.6 Ukoliko Korisnik leasinga sam ugrađuje dodatne brave, alarmne uređaje i sličnu opremu za zaštitu Predmeta leasinga, dužan je da za to pribavi pisanu saglasnost Davaoca leasinga i da mu preda odgovarajuća sredstva za otključavanje, odnosno deblokadu takvih dodatnih brava, alarmnih uređaja i slične opreme.

7.7 Korisnik leasinga preuzima na sebe sve rizike vezane za posjed, držanje i pogon, odnosno korištenje Predmeta leasinga. Korisnik leasinga se također obavezuje da će osloboditi Davaoca leasinga svih zahtjeva koje bi treće osobe prema njemu postavile, a koji se temelje ili proizilaze iz posjeda, držanja i korištenja Predmeta leasinga, uključujući i zahtjeve za naknadu štete nanesene trećim osobama, bez obzira da li je ona nastala ličnom krivicom, krivicom trećih osoba, zloupotrebom, slučajem ili višom silom, te zahtjeva po osnovu zaštite autorskih prava, prava na patent, model, uzorak ili žig i svaku drugu sličnu zaštićenu tvorevinu, odnosno pravo. U slučaju da za Davaoca leasinga nastane obaveza koja se temelji ili proizilazi iz posjeda nad Predmetom leasinga, Korisnik leasinga se obavezuje da će ovu obavezu izmiriti o svom trošku.

7.8 Davalac leasinga kao vlasnik Predmeta leasinga, ili drugo od njega ovlašteno lice, ima pravo tokom trajanja Ugovora uvijek i bez prethodne najave pregledati Predmet leasinga, ispitati njegova svojstva i provjeriti da li se Predmet leasinga koristi u skladu sa njegovom namjenom i dužnom pažnjom. U slučaju da Korisnik leasinga onemogućuje Davaocu leasinga pregled Predmeta leasinga u roku od petnaest (15) dana od dana kada je Davalac leasinga to zahtijevao pisanim putem od Korisnika leasinga, Davalac leasinga ima pravo raskinuti Ugovor i zahtijevati povrat Predmeta leasinga.

7.9 Korisnik leasinga se obavezuje da će dokumentaciju vezanu za korištenje Predmeta leasinga (saobraćajnu dozvolu, police osiguranja, i slično) držati isključivo kod sebe, a ne u Predmetu leasinga.

7.10 Korisnik leasinga dužan je da u slučaju gubitka ključa, saobraćajne dozvole, kôd kartice ili master ključa Predmeta leasinga, kao i u slučaju pljenidbe ili oštećenja Predmeta leasinga, o tome obavijesti Davaoca leasinga i osiguravatelja pisanim putem, sve u roku od osam (8) dana.

7.11 Predmet leasinga smije koristiti isključivo Korisnik leasinga, te eventualno osobe navedene u listi korisnika iz Ovlaštenja za korištenje Predmeta leasinga.

7.12 Korisnik leasinga se obavezuje predati Davaocu leasinga sredstva za deblokadu pogona, alarma i ostalih sigurnosnih uređaja koje naknadno ugradi u Predmet leasinga.

7.13 U slučaju nastanka štetnog događaja (npr. krađe), te nemogućnosti naplate osiguranja zbog ne posjedovanja potrebne dokumentacije (npr. saobraćajne dozvole) ili drugog propusta koji se može staviti na teret Korisniku leasinga, Korisnik leasinga dužan je nadoknaditi Davaocu leasinga tako nastalu štetu.

7.14 Za prekršaje koji su u neposrednoj vezi sa korištenjem Predmeta leasinga odgovara isključivo Korisnik leasinga. Korisnik leasinga dužan je Davaocu leasinga nadoknaditi sve stvarne troškove koje pretrpi odlukom državnog organa povodom učinjenog prekršaja.

## 8. OSIGURANJE PREDMETA LEASINGA

8.1 Za svo vrijeme trajanja Ugovora Korisnik leasinga je dužan, o svom trošku, u ime Davaoca leasinga kao korisnika osiguranja, zaključiti ugovor o kasko i obaveznom osiguranju Predmeta leasinga. Korisnik leasinga je dužan, bez odlaganja, dostaviti Davaocu leasinga jedan originalni primjerak police kasko osiguranja nakon zaključenja iste.

8.2 Korisnik leasinga ima pravo samostalno odabrati osiguravatelja prema listi osiguravajućih društava prihvatljivih za Davaoca Leasinga, te ima pravo promjene istog tokom trajanja Ugovora, ali uz prethodnu pisanu saglasnost Davaoca leasinga, a prema listi osiguravajućih društava prihvatljivih za Davaoca leasinga.

8.3 Zaključena polica osiguranja mora biti vinkulirana u korist Davaoca leasinga, a jedan originalni primjerak važeće police osiguranja mora biti dostavljen Davaocu leasinga.

8.4 U slučaju neizmirivanja obaveza prema osiguravajućoj kući po osnovu kasko osiguranja Davalac leasinga može Korisniku leasinga poslati obavijest o navedenom kašnjenju o svom trošku.

8.5 Ako je Predmet leasinga motorno vozilo, Korisnik leasinga je dužan zaključiti policu obaveznog osiguranja od odgovornosti, kao i potpunog („ful“) kasko osiguranja. Kopija police obaveznog osiguranja mora biti dostavljena Davaocu leasinga.

## 9. OSIGURANI SLUČAJ I NAKNADA ŠTETE

9.1 U slučaju štetnog događaja (djelimična šteta ili kvar), Korisnik leasinga se obavezuje da bez odlaganja dopremi Predmet leasinga na popravak isključivo u najbliži ovlašten servis i dostavi Davaocu leasinga odmah pisanu prijavu štete, odnosno kvara. Korisnik leasinga se obavezuje da bez odlaganja preduzme sve radnje i mjere u skladu sa uslovima osiguravatelja propisanim za postupak prijave, procjene i likvidacije štete.

9.2 U slučaju krađe ili totalne štete na Predmetu leasinga, Korisnik leasinga se obavezuje da bez odlaganja podnese prijavu krađe ili totalne štete nadležnom policijskom organu, kao i osiguravajućem društvu, te da o tome odmah pisanim putem obavijesti Davaoca leasinga. U tom slučaju dolazi do raskida Ugovora u roku od trideset (30) dana od prijema pisanog obavještenja od osiguravajućeg društva da je nastala krađa ili totalna šteta na Predmetu leasinga, pri čemu je Korisnik leasinga dužan izmiriti sve dospjele obaveze do dana raskida Ugovora, osim ako u tom roku Predmet leasinga ne bude pronađen i vraćen Davaocu leasinga.

9.3 U slučaju da pretrpljena šteta ne bude nadoknađena u cjelini ili djelimično od strane društva za osiguranje, a na osnovu uslova osiguranja i ugovora o osiguranju (polise osiguranja) sa kojima je Korisnik leasinga upoznat prije potpisivanja ovog ugovora o leasingu, Korisnik leasinga se obavezuje da Davaocu leasinga isplati ukupnu štetu i nadoknadi dio neisplaćene štete i sve dodatne troškove (uključujući i učešće u šteti i veću amortizaciju vozila usljed kojeg je umanjen iznos isplaćene štete), odnosno o svom trošku vrati Predmet leasinga u prvobitno stanje. Visinu štete će procijeniti stručno lice (ovlašteni sudski vještak) koje odredi Davalac leasinga. Korisnik leasinga se obavezuje da procijenjeni iznos štete i sve troškove procjene visine štete uplati na račun Davaoca leasinga u roku od osam (8) dana od procjene iste. Korisnik leasinga izričito izjavljuje da je saglasan da se u svrhu naknade štete mogu koristiti i sredstva

obezbjeđenja plaćanja iz Ugovora.

9.4 Ukoliko se vozilo koristi za obavljanje posebne djelatnosti/namjene (rent-a-car, autoškola, podzakup i sl.) u kojoj Korisnik leasinga nije prilikom zaključenja obavjestio Davaoca leasinga radi ugovaranja kasko polise po uslovima predviđenim za ove djelatnosti, Korisnik leasinga je dužan da nadoknadi svu stvarnu štetu koju pretrpi Davalac leasinga i to posebno štetu iz prethodnog člana 9.3.

9.5 U slučaju totalne štete na Predmetu leasinga, Korisnik leasinga dužan je olupinu Predmeta leasinga vratiti u posjed Davaoca leasinga. Prevoz olupine Predmeta leasinga bit će obavljen o trošku Korisnika leasinga, a sredstva ostvarena prodajom olupine Predmeta leasinga prvenstveno služe za namirenje preostalih obaveza Korisnika leasinga prema Davaocu leasinga.

9.6 Ako je do štete došlo uslijed neodgovornog korištenja i neispravnosti na Predmetu leasinga, Davalac leasinga nije odgovoran Korisniku leasinga ili trećem licu za štetu nastalu korištenjem Predmeta leasinga.

9.7 Korisnik leasinga u potpunosti snosi svaku odgovornost za štetu nanесenu trećim licima, kao i za kršenje propisa iz oblasti sigurnosti saobraćaja, sve u skladu sa važećim propisima.

## 10. SREDSTVA OSIGURANJA UGOVORA

10.1 Davalac leasinga će sa Korisnikom leasinga izričitim odredbama Ugovora o operativnom leasingu u skladu sa procjenom boniteta ugovoriti neko od sljedećih sredstava obezbjeđenja:

Mjenica -vrijednosni papir i vjerodostojna isprava koja sadrži obavezu na bezuvjetno plaćanje novčanog iznosa. Davalac leasinga kao mjenični povjerilac može pokrenuti izvršni sudski postupak na osnovu vjerodostojne isprave,

Sudužništvo, kojim Sudužnik preuzima obavezu da Davaocu leasinga odgovara za cijelu obavezu Korisnika leasinga tako da Davalac leasinga može zahtijevati njeno ispunjenje bilo od glavnog dužnika, tj. Korisnika leasinga, bilo od Sudužnika ili od obojice u isto vrijeme,

Administrativna zabrana -kojom Korisnik leasinga / Sudužnik daju saglasnost da radi naplate potraživanja Davaoca leasinga zaplijeni dio njegove plaće i da se izravno isplati Davaocu leasinga na način utvrđen u toj ispravi,

Založno pravo na pokretnoj ili nepokretnoj imovini, Druge vrste obezbjeđenja prihvatljive za Davaoca leasinga.

10.2 Davalac leasinga ima pravo u slučaju kašnjenja aktivirati sredstva osiguranja po svom izboru, pri čemu aktiviranje jednog sredstva osiguranja ne isključuje istovremeno aktiviranje ostalih sredstava osiguranja.

10.3 Davalac leasinga ima pravo zatražiti i druga sredstva osiguranja ili zamjenu postojećih sredstava osiguranja u slučaju da dođe do promjene boniteta izdavaoca mjenice, kao i u slučaju da neka od navedenih sredstava osiguranja budu iskorištena ili izgube na svojoj važnosti. U navedenim slučajevima Korisnik leasinga je u obavezi dostaviti zamjenska sredstva osiguranja.

10.4 U slučaju da Davalac leasinga iskoristi sredstvo osiguranja, a ugovorne strane se nakon toga sporazumiju da

Ugovor ipak održe na snazi, Korisnik leasinga je obavezan da najkasnije 3 (slovima: tri) dana od postizanja sporazuma da Ugovor ostane na snazi dostavi Davaocu leasinga adekvatne i ispravne instrumente obezbjeđenja plaćanja kojima se zamjenjuju iskorišteni instrumenti obezbjeđenja plaćanja. Ukoliko Korisnik leasinga to ne učini u ostavljenom roku smatrat će se da Ugovor nije sporazumno održan na snazi.

### Mjenice

10.5 Kao sredstvo osiguranja urednog izmirenja obaveza, i to plaćanja ugovorenih naknada, dugova, kamate, pripadajućih troškova, kao i svih drugih obaveza Korisnika leasinga, nastalih po osnovu i u vezi sa Ugovorom, Korisnik leasinga se obavezuje da dostavi Davaocu leasinga bjanko mjenice (čiji broj je određen Ugovorom o operativnom leasingu) koje će Korisnik leasinga potpisati u svojstvu mjeničnog dužnika i, ako se radi o pravnom licu ili preduzetniku, iste ovjeriti pečatom svoje firme, a kojima garantuje Davaocu leasinga za sve dospjele obaveze iz i po osnovu Ugovora o operativnom leasingu, te će Davaocu leasinga izdati i pečatom ovjeriti odgovarajuća mjenična ovlaštenja (po jedno za svaki Ugovor) kojim ga ovlašćuje da u slučaju neplaćanja bilo kog dospjelog iznosa iz Ugovora ispuni ove mjenice, prezentira ih na naplatu i preduzme sve druge radnje radi naplate potraživanja.

10.6 Potpisom Ugovora o operativnom leasingu, Korisnik leasinga ovlašćuje Davaoca leasinga da u slučaju neplaćanja bilo kog dospjelog iznosa na osnovu i u vezi sa Ugovorom ispuni takvu mjenicu i u nju unese sve potrebne elemente, uključujući i mjenični iznos koji odgovara dospjelom iznosu i da, radi naplate mjenice, preduzme sve radnje predviđene propisima. Ugovorne strane se izričito sporazumijevaju da sa postavljanjem zahtjeva i/ili preduzimanjem mjeničnih radnji od strane Davaoca leasinga ne dolazi do novacije Ugovora o operativnom leasingu, odnosno obaveze Korisnika leasinga iz Ugovora o operativnom leasingu ne zamjenjuju se mjeničnim obavezama. Zakupac je izričito saglasan da se svako i sva sredstva obezbjeđenja potraživanja Davaoca leasinga iz Ugovora o operativnom leasingu odnose i na potraživanja iz mjenica.

10.7 Ukoliko odredbama Ugovora o operativnom leasingu nije ugovorena dostava mjenice, kao sredstva obezbjeđenja urednog izmirenja obaveza, isključena je primjena odredbi 10.5 i 10.6 Opštih uslova.

### Sudužnik

10.8 Ukoliko ugovorne strane Ugovorom o operativnom leasingu to predvide, Korisnik leasinga je dužan da obezbijedi sudužnika. Sudužnik u smislu važećih zakonskih propisa je pravna ili fizička osoba koja je odgovorna za naplatu svih potraživanja Davaoca leasinga jednako kao i Korisnik leasinga.

10.9 Sudužnik odgovara Davaocu leasinga za sve obaveze Korisnika leasinga iz Ugovora o operativnom leasingu, i ukoliko ugovorne strane tako ugovore, u obavezi su da na ime obezbjeđenja plaćanja svih obaveza iz Ugovora i Opštih uslova predaju ugovoreni broj bjanko mjenica, popunjene na zakonom propisan način, kao i odgovarajuća mjenična ovlaštenja u broju izdatih mjenica, u korist Davaoca leasinga, te je Davalac leasinga u skladu sa tim ovlašten da u slučaju dospelosti bilo koje obaveze iz ili po osnovu Ugovora, zahtjeva ispunjenje ili da sprovede izvršenje na cjelokupnoj imovini, kako od Korisnika leasinga tako i od sudužnika.

10.10 Ukoliko odredbama Ugovora o operativnom leasingu

nije ugovoreno sudužništvo, kao sredstvo osiguranja urednog izmirivanja obaveza, isključena je primjena odredbi 10.8 i 10.9 Opštih uslova.

## **11. VRAĆANJE PREDMETA LEASINGA, MJESTO I VRIJEME VRAĆANJA, TROŠKOVI VRAĆANJA PREDMETA LEASINGA**

11.1 Korisnik leasinga je nakon isteka ili raskida Ugovora, dužan odmah, a najkasnije u roku od osam (8) dana od dana isteka ili raskida Ugovora, predati Davaocu leasinga u posjed Predmet leasinga u ispravnom stanju, sa stepenom iskorištenosti koji se može očekivati prema normalnim i uobičajenim okolnostima upotrebe, sa kompletnom standardnom opremom, tehničkom dokumentacijom i svim ključevima. Nakon prestanka Ugovora, Korisnik leasinga nije više ovlašten držati, niti koristiti Predmet leasinga, te je ujedno dužan, bez odlaganja, vratiti Davaocu leasinga u neposredni posjed Predmet leasinga i to na mjestu i u vrijeme koje odredi Davaocu leasinga. U suprotnom se Korisnik leasinga obavezuje da nadoknadi svu štetu procijenjenu od strane sudskog vještaka kojeg odredi Davaocu leasinga. Troškove eventualne procjene Predmeta leasinga snosi Korisnik leasinga, a isti će biti utvrđeni konačnim obračunom koji će biti dostavljen Korisniku leasinga.

11.2 Korisnik leasinga je dužan da, prije povrata Predmeta leasinga Davaocu leasinga, sva oštećenja i nedostatke čije je otklanjanje pokriveno policom kasko osiguranja ili garancijom, ukloni i Predmet leasinga dovede u ispravno stanje.

11.3 Korisnik leasinga je dužan, prije povrata Predmeta leasinga, skinuti sve oznake i naljepnice koje su postavljene na Predmet leasinga nakon njegovog preuzimanja. Predmet leasinga mora biti vraćen Davaocu leasinga očišćen iznutra i izvana, sa pratećom opremom koja je preuzeta prilikom primopredaje novog Predmeta leasinga.

11.4 Ukoliko Korisnik leasinga ne izvrši povrat Predmeta leasinga u stanju opisanom u članovima 11.1 – 11.3, dužan je Davaocu leasinga nadoknaditi troškove povrata Predmeta leasinga u ispravno stanje, kao i ugovornu kaznu za neovlašteno zadržavanje Predmeta leasinga u visini jedne mjesečne leasing naknade za svaki mjesec zakašnjenja u primopredaji, sve na osnovu fakture Davaoca leasinga i u roku od osam (8) dana od dana prijema iste.

11.5 Ukoliko Korisnik leasinga ne izvrši povrat Predmeta leasinga na način definisan ovim članom, Davaocu leasinga, ili od njega ovlašteno lice, ima pravo bez ikakvog daljeg preduslova, o trošku Korisnika leasinga, zakonom dozvoljenim radnjama vratiti u svoj neposredni posjed Predmet leasinga, uključujući i pravo na samopomoć. U tom slučaju, Korisnik leasinga ovim putem izričito izjavljuje da je saglasan sa ovakvim načinom povrata posjeda nad Predmetom leasinga od strane Davaoca leasinga, te se neopozivo odriče prava da nadležnim organima podnosi bilo kakav zahtjev protiv Davaoca leasinga, posebno zahtjev za zaštitu zbog ometanja posjeda. Korisnik leasinga je dužan preduzeti sve mjere koje su pravno i stvarno potrebne da bi omogućio Davaocu leasinga da nesmetano uživa svoje pravo vlasništva nad Predmetom leasinga.

11.6 Mjesto i vrijeme povrata Predmeta leasinga određuje Davaocu leasinga. Prilikom povrata Predmeta leasinga bit će sačinjen zapisnik o primopredaji i pregledu vozila, u kojem će biti navedena sva vidljiva oštećenja i nedostaci na Predmetu leasinga, koji će biti potpisan od strane Korisnika leasinga. Istim zapisnikom bit će utvrđen i broj pređenih kilometara u trenutku povrata Predmeta leasinga, na osnovu kojeg će u

slučaju prekoračenja ugovorenog broja pređenih kilometara biti sačinjen i obračun naknade u skladu sa odredbama Člana 4. Ugovora. Također će biti izvršena i procjena Predmeta leasinga od strane ovlaštenog sudskog vještaka.

11.7 Ukoliko su na Predmetu leasinga izvršene promjene, Korisnik leasinga dužan je Predmet leasinga vratiti u njegovo prvobitno stanje o vlastitom trošku, osim za zakonom propisane promjene ili promjene za koje je prethodno pribavljena saglasnost Davaoca leasinga. Korisnik leasinga dužan je predati Davaocu leasinga i sredstva za deblokadu pogona, alarma i ostalih uređaja koje je naknadno ugradio u Predmet leasinga. Ukoliko Korisnik leasinga, odmah i na prvi poziv, a nakon predaje Predmeta leasinga u posjed Davaoca leasinga, ne ukloni vlastite stvari i opremu sa ili iz Predmeta leasinga, one postaju vlasništvo Davaoca leasinga, bez prava Korisnika leasinga na ikakvu naknadu.

## **12. ISPUNJENJE UGOVORNIH OBAVEZA**

12.1 Nakon što je Korisnik leasinga ispunio sve svoje obaveze plaćanja po Ugovoru, te vratio Predmet leasinga Davaocu leasinga u ispravnom stanju i u skladu sa Ugovorom, a najkasnije zadnjeg dana trajanja Ugovora, smatrat će se da je Korisnik leasinga ispunio sve obaveze prema Davaocu leasinga po Ugovoru.

12.2 Neiskorištena sredstva osiguranja Korisnik leasinga i Sudužnik može lično preuzeti u centrali Davaoca leasinga u roku od trideset (30) dana od dana izmirenja obaveza po Ugovoru, a ukoliko to ne učini, neiskorištena sredstva osiguranja bit će mu dostavljena preporučenom poštom na posljednju poznatu adresu.

## **13. RASKID UGOVORA**

13.1 Davaocu leasinga može u svako doba s trenutnim učinkom jednostrano raskinuti Ugovor dostavljanjem pisanog obavještenja Korisniku leasinga u slučajevima koji su izričito definisani Članom 8. Ugovora o operativnom leasingu. Davaocu leasinga koji raskide ugovor iz razloga koji su predviđeni Ugovorom u skladu sa Zakonom o leasingu ima pravo na povrat predmeta leasinga, kao i pravo na naknadu štete kako je to definisano narednim članom i Ugovorom o operativnom leasingu. Raskidom ugovora Korisnik leasinga gubi pravo posjedovanja i korištenja predmeta leasinga, a plaćene naknade neće se smatrati plaćanjem predmeta leasinga i ne daju pravo Korisniku leasinga na dio vlasništva nad predmetom leasinga.

13.2 U slučaju raskida Ugovora, Korisnik leasinga nema pravo na povrat akontacijske naknade. Davaocu leasinga će sačiniti i Korisniku leasinga dostaviti obračun koji će sadržavati sva potraživanja koja proizilaze iz Ugovora i to neplaćene dospjele leasing naknade, opomene, zatezne kamate, troškove popravke, naknadu za prekoračenje ugovorenog broja pređenih kilometara, kao i naknadu štete u iznosu koji je utvrđen ugovorom. Obračunati iznos Korisnik leasinga je obavezan platiti Davaocu leasinga u roku od osam (8) dana od dana prijema pisane obavijesti.

## ZAVRŠNE ODREDBE

### 14. SUDSKANADLEŽNOST

14.1 Za sve sporove proizašle iz ili u vezi sa Ugovorom, primjenjivat će se pravo Bosne i Hercegovine, Federacije Bosne i Hercegovine i Republike Srpske, a o sporu će odlučivati Opštinski sud u Sarajevu.

### 15. OSTALE ODREDBE

15.1 Korisnik leasinga i Sudužnik su dužni, bez odlaganja, a najkasnije u roku od osam (8) dana od dana nastanka promjene, preporučenim pismom obavijestiti Davaoca leasinga o svim promjenama ličnog i porodičnog imena, kućne adrese, adrese poslodavca, promjenama sjedišta, poslovnog imena, osnovne djelatnosti, statusnim i drugim promjenama koje se registruju kod nadležnog organa, te promjenama ovlaštenja za zastupanje, što se posebno odnosi na lica ovlaštena za zastupanje, obim njihovih ovlaštenja i opunomoćenih lica, kao i svim drugim promjenama bitnim za nesmetano obavljanje poslovanja Korisnika leasinga sa Davaocem leasinga poput promjene zaposlenja, gubitka zaposlenja, smanjenja ili gubitka prihoda i drugih sličnih podataka. Ukoliko Korisnik leasinga ili Sudužnik ne ispuni ovu svoju obavezu, svaka dostava obavještenja i drugih pismena na adresu navedenu u Ugovoru smatrat će se važećom, bez obzira da li je Korisnik leasinga, odnosno Sudužnik primio pošiljku ili ne, a danom prijema preporučene pošiljke smatrat će se dan slanja iste od strane Davaoca leasinga.

15.2 Korisnik leasinga dužan je do kraja prvog kvartala svake kalendarske godine, u toku trajanja Ugovora, dostaviti Davaocu leasinga svoj ovjereni bilans stanja i bilans uspjeha za prethodnu poslovnu godinu.

15.3 Posebni dogovori su valjani i obavezujući za strane potpisnice samo ukoliko su sačinjeni u pisanoj formi, potpisani od strane ovlaštenih lica i ovjereni pečatima ugovornih strana.

15.4 Moguća nevaljanost neke od odredbi Opštih uslova ne povlači sa sobom nevaljanost cijelih Opštih uslova. U ovakvom slučaju, nevaljana odredba će biti zamijenjena valjanom odredbom koja odgovara cilju i svrsi Opštih uslova. Na sva pitanja koja nisu regulisana ovim Ugovorom, primjenjivat će se odredbe Zakona o leasingu FBiH i RS i Zakona o obligacionim odnosima.

15.5 U slučaju kolizije odredbi iz Ugovora, odredbi iz Opštih uslova poslovanja i drugih akata Davaoca leasinga, prioriteto važe odredbe Ugovora, a zatim odredbe Opštih uslova poslovanja i drugih akata Davaoca leasinga.

15.6 Svojim potpisom na ovim Uslovima, Korisnik leasinga potvrđuje da ih je pročitao, razumio i kao svoju slobodno izraženu volju preuzeo Uslove kao i sva prava i obaveze koje iz njih proizilaze.

15.7 Ovi Opštih uslovi su sačinjeni i potpisani u 2 jednaka primjerka, od kojih jedan ostaje kod Davaoca leasinga, dok se jedan predaje Korisniku leasinga.

15.8 Davalac leasinga će o izmjenama i dopunama ovih Opštih uslova obavijestiti Korisnika leasinga o svom trošku, i to objavljivanjem putem svoje web stranice, na adresi [www.porscheleasing.ba](http://www.porscheleasing.ba). Smatrat će se da je Korisnik leasinga uredno obaviješten o izmjenama i dopunama Opštih uslova danom objave iste na web stranici Davaoca leasinga.

**Ovi Opšti uslovi stupaju na snagu danom njihove objave na web stranici Davaoca leasinga.**

August, 2018. godine

Korisnik leasinga: \_\_\_\_\_

Davalac leasinga: \_\_\_\_\_

Sudužnik: \_\_\_\_\_

Broj ugovora o leasingu: \_\_\_\_\_

Mjesto i datum: \_\_\_\_\_